

Fieste de Patrie dal Friûl

A Voleson Darzin lis celebracions uficiâls pai 941 agns

Ai 8 di Avrîl dal 2018, tal comun di Voleson Darzin e je stade fate la celebracion uficiâl de Fieste de Patrie dal Friûl: la cerimonie vivarose e la grande partecipazion di int a àn dimostrât che il sintiment di identitât dal popul furlan al è simpri plui fuart e inlidrisât. Di fat, dongje dal grant public presint, a son stâts tancj ancje i sindics e i aministradôrs, intal ricuart di chê date impuartante dai 3 di Avrîl dal 1077, cuant che l'imperadôr Indri IV i à dade la contee ducâl dal Friûl al patriarce di Aquilee Siart.

Il sindic di Voleson Darzin, Markus Maurmair - ancje a non dai comuns di Cjasarse e di S. Zorç da la Richinvelde, unîts chest an intal dâ acet ae Fieste - al à vût peraulis di agrât pes tantis autoritâts che a son intervignudis, scomençant dal sindic di Sapade Manuel Piller Hoffer: a lui i à tocjât il compit di passâ il testimoni, la bandiere dal Friûl che l'an passât e veve svintulât di adalt dal cjampanili sapedin.

Dilunc dal event, la ARLeF – istituzion che par cont de Regjon F-VJ e à coordinadis lis celebracions uficiâls e ancje il calendari, cuntun centenâr di events su dut il teritori furlanofon - e à ricuardât cemût che la identitât e sedi la sume di fatôrs diviers, un prodot di esperiencis, di relazions, ma soreddut di lenghe. Di fat, la particularitât dal Friûl e je propit inte sô pluralitât linguistiche e inte fuarce de stesse lenghe furlane, espression di un popul che al à cussience des sôs lidris e che al è viert al confront.

Prime de manifestazion civîl, a Darzin, inte glesie di S. Michêl, e je stade celebrade la Messe par furlan, cun leturis ancje par todesc e par sloven. Po dopo, tal dopomisdì, la citadine di Voleson e je stade animade di un program cetant siôr: par dut il dopomisdì, lis



salis dal Cjistiel a àn ospitat "Pachis e Patrie", un spettacul teatrâl itinerant scrit di pueste pe Fieste, che al à vût simpri tant public in dutis cinc lis rappresentazions programadis. Curât di Matarans Academy, Piçule Scuole di Teatri par fantats de "La Compagnia dei Guitti", il spettacul al contave i events sucedûts pardabon te gnot di Sant Martin dal 1582, inte plane furlane.

Cun di plui, inte curnis splendide de place dal Cjistiel medievâl, un biel public al à dât acet ai atletis de seconde edizion de Stafete des Lenghis Minoritariis dal Friûl, la manifestazion sportive promovude de Regjon e de ARLeF, e coordinade de Associazione Maratonina Udinese. Partide di Aquilee sabide ai 7 di Avrîl, la Stafete e je rivade a Voleson dopo di un percors di 118 km, passant par

20 comuns. Inte corse a son stâts coinvoltis 150 atletis, une ventine di associazions e un centenâr di scuelârs, e dutis lis tapis a àn vût pardabon un grant acet: un dai contribûts plui bieci che il sport al pues dâ par rinfuarçâ il sens di apartignince, che al va adun cul leam cu la lenghe furlane e cu la culture dal multilinguism.



In alt o fradis, o int di Aquilee,
devant da la Storie, di front dal doman.
Sin flame ch'e vîf pes stradis dal mont.
Sin non di une Patrie, sin fis dal Friûl.

Scolte o Friûl, o tiere di libars,
di lenghis e popui sês cjase di pàs.
Dai secui i paris nus clamin adun
a fâsi lidris di un unic destin.

In alt o Friûl, o Patrie mê sante,
di fuarce e sperance si viest la tô int.
Un popul sigûr ch'al cjamine te lûs
incuintri al doman, incuintri ai siei fis.



L'IMNI UFICIÂL DE PATRIE DAL FRIÛL

Gracis ae idee dal Istitût Ladin Furlan "Pre Checo Placerean" e dal "Messaggero Veneto", e cul patrocini de ARLeF, la Patrie dal Friûl e à cumò un so imni uficiâl. Scrit di Renato Stroili Gurisatti e musicât dal mestri Valter Sivilotti, l'imni vincidôr al è stât sielzût di une jurie di esperts tant che il miôr fra i dîs presentâts ae Agenzie Regionâl pe Lenghe Furlane.

La motivazion che lu à viodût vincidôr e rimarce cemût che "musiche e test si integrin a vicende, midiant di une scritture vocâl e strumentâl di grant respir e di slanç di cjant potent".

La proclamazion e je stade fate a Voleson Darzin ai 8 di Avrîl dal 2018, in ocasion des celebracions pe Fieste de Patrie dal Friûl. La Agenzie e je daûr a lavorâ, dutune cui autôrs, par organizâ une "prime" di presentazion uficiâl dentri dal mêis di Otubar.

Di chel moment, a saran disponibii i spartîts intes variis declinazions, che si podaran doprâ intes occasions uficiâls.